

San Judas

Jacheuayama

¹ Atše Judas, Jesucristbe oservená y Santiagbe catsata, quem tsbuanácha séntsabiamná, ndémuanÿengbioye Bèngbe Bètsá, chë Taitá chabe entsánga chamotsemnama tojáchembo, chabe bonshánënga, y ndémuanÿenga Jesucristo endánÿena. ² Atše, Bèngbe Bètsá séntseimpadana, cha puerte lastemado tsëngaftangaftaca chaotsemnama, cha chaoma tsëngaftanga ainaniñe tsábe ebionana chašmotsebonnama, y chaoma tsëngaftanga cada te más Bèngbe Bètsábioye y ínÿengbioye chašmotsababuánÿeshanama.

Chë ndoñe ndegombre soyënga buátëmbayënga

³ Atšbe bonshánënga, atše tša séndboše tsëngaftanga jubuábiamama, ntšamo Jesucristo bèngbe bacna soyënguentsana šojátsebacama, tsëngaftangbioye y bèngbioynaca; pero atše séntsejuabná atše šojtsemna tsëngaftanga jubuábiamana, jáimpadama bëtscá chašmotsama Jesucristbe soyëngama, chë mondošbuaché soyëngama jenujuérezama, ndoñe chaondopochocama. Chë soyënga Bèngbe Bètsá chabe entsánga canÿe tojatsatá, y nÿetsca tescama.

⁴ Er tsëngaftanga ntšamo ínÿenga

imomnama ntjatatsëmboncá, básefta entsánga tsëngaftangaftaca tmojenutaná. Chënga mondmëna Bèngbe Bètsá ndoñe adórayënga, y chë buátëmbana soyënga tmojtsetrocá. Bèngbe Bètsá bèngbe tsábiamana juabna yobómnyeyeca, chënga jtsichámuana tsëngaftanga šmojtsovena nÿetsca bacna soyënga jtsamëse jtsiyenana, jenomándama ntšobencá ca; y chca, chënga montseboše jinÿanÿiyama, Jesucristo ndoñe bèngbe canÿe Nduiño y Bèngbe Utabná chëngbiama yondmëna ca. Y bayté, Bèngbe Bètsabe uabemana palabrënguiñe tmojanábema, chë chca amëngna jtsamnana nÿetsca tescama castigánënga jtsemnama ca.

⁵ Masque tsëngaftanga lempe quem soyama ya šmondétatsëmbo, atše séntseboše jamama tsëngaftanga chašmotsenojuabná, Bèngbe Utabná, Israeloca entsánga Egiptoquëngbe cucuatšentsana tojanatsebacá chentsana, cachá chë Israeloquënguentše chábeñe ndošbuáchiyënga tojánapochocama; ⁶ y cachcá chë angelëngbiámnaca, ndémuanÿenga ndoñe tmonjanoquedá chë tmojanóyëngacñe mándoca, pero aíñe chëngbe luarënga cachcá imojéftsonÿaye. Chë causa, Bèngbe Bètsá tojanmandá cadenëjuangaca nÿetsca tescama chamoquedama, chë más ibetiñe, tondaye binÿiniñe

luarentše, chënga bacna soyënga tmojanmama nyetsca tescama castigánënga jtsemnana vojtsamna ca, cha jayanama tescama. ⁷Y chë Sodoma y Gomorra, y chë béconana pueblënguentše entsangbiámnaca; chëngnaca cach angelëngcá ndoñe tšabá monjánama, y nyetsca bacna soyënga imojánama boyabása o shembásaftaca, y ínÿengaftaca y bayëngaftácnaca. Chíyeca chënga tmonjansufrí chë íñeshca castigo nyetsca tescama, y chca, nyetsca yochjopása chë chca Bëngbe Bëtsábiöye ndoñe tbontsobedecenáftaca.

⁸Cachcá, chë ndoñe ndegombre soyënga buátëmbayëngnaca chë mo otjenayoquécá tmojáninÿe soyëngama jtsichámuana, y chë causa cachëngbe cuerpëngama bacna soyënga jtsamana, chë mando bomnëngbiöye jtsébátenana, y chë espíritënga obenana bomnëngbiama ndoñe tšabá ntsichámuana, mo chëngbiöye cuafjoyanguangcá. ⁹Pero ni mo chë angelëngbe mandaya Miguel quem buátëmbayëngcá tojanama. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiama podesca soyënga, jóyenguanguse, ndayá nÿe mëntšá ibojauyana: “Bëngbe Utabná chacmácacana ca.” ¹⁰Pero quem buátëmbayëngna, chë ndoñe tontsésertana soyëngama podesca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtsésertancá jtsamëse, jamana chënga nyetsca tescama castigánënga jtsemnana chamotsajnama.

¹¹¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbiöye tbojanóba. Chënga crocénana juácanama, mo Balaam yojanamcá, Bëngbe Bëtsabe tšabe benachentšana tmojtsojuánafe, bacna soyënga jamama. Chënga chë amëndayëngcá Bëngbe Bëtsá tojanabacacángbiöye ndoñe ntsayaunanana, ntšamo Coré, Moisés y Aarónbiöye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

¹²Chëngna tsëngaftangbiama jtsemnana mo canÿe ndëtsenga luarentše canÿe bëts tsengacá, tsëngaftangaftaca tmojenutaná ora, cánÿiñe jasama mo Jesucrístbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nÿe chënga tšabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbiama jtsantješnana, ínÿengbiama ndoñe. Chënga tša jtsašebuachiyana, pero chëngbe buátëmbana soyënga ínÿengbiama tondayama ntoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. ¹³Chënga nyets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga

imobomnama. Chca, chënga jtsemnana mo mar béjayoca oleshëngcá, chentšana espumushënga bëtscá tsenguéshëca jtsóboconana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binýniñe luarentše nyetsca tescama chënga chamoquedama.

¹⁴ Adánbentšana chnénguana pamillo entsanga tmojánachnéjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Šmochjinýe, Bëngbe Utabná echanjabo bëtscá uaranga angelëngaftaca, ¹⁵ nyetsca entsangbiama jabáyanama ntšamo tmojamcá tšabá o ndoñe tšabá bëtsemnama; y cha echanjamánda chë Bëngbe Bëtsábioye ndoñe adórayënga nyetsca tescama castigánënga chamotsemnama, tša bacna soyënga chabe contra tmojamama, y bacna soyënga chabe contra tmojanayama, chënga, chë puerte bacna soyënga amënga ca” —tojánayana. ¹⁶ Chënga mondmëna chë tšabe soyëngama nyets tempo podesca ichámënga, y ndocna te tondáyëca oyejuayënga ntsemnana. Chënga jtsiyenana bacna soyënga jtsamëse nye cachënga tšabá jtsomñama, y puerte botamana palabrénga jtsichámuana uámanënga jtsenobiamnayëse, y tšabe soyënga ínýengbioye jtsëtsënyayana, chënga tšabá joquédama y chëngbentšana ndayánaca josháchiñama.

Ošbuáchiyënga jábuayenama

¹⁷ Pero tšëngaftanga, atšbe bonshánëngna, šmochtsenójuabnaye

ndayá chë Bëngbe Utabná Jesucristbe ichmónënga tmojanéyanama, mëntšá: ¹⁸ “Jesucristo quem luare jésabama tempo chaojtsobeco ora, mochántsemna entsanga, y chënga mochantsiyena jtsamëse nye cachënga tšabá jtsomñama bacna juabnéngaca, y tšëngaftanga cmochantsébuayajuana ca.” ¹⁹ Chënga mondmëna chë ošbuáchiyënguentše nyetscanga ndoñe cachcá chamondétsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espiritu, chëngbe ainaniñe chaotsemándama.

²⁰ Pero tšëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóboconana ošbuáchiyana, y Bëngbe Bëtsáftaca šmochjencuénta, ntšamo Uámana Espiritu tmojtsamëndacá. ²¹ Yejuana šmochtsantješna tšëngaftanga nyets tempo chašmotsiyenama, Bëngbe Bëtsá cmababuánýeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nyetsca tescama yomna tšabe vida chašmotsebomnama.

²² Chë inýe ora aíñe y inýe ora ndoñe Jesucristbeñe ošbuáchiyana bomnënga šmochtsalastemana.

²³ Bëtscá šmochtsama, báseftanga chë uabouana castigüentšana atsebácanënga chamotsemnama, mo chënga íneshentšana cuaftëbuacancá. Inýengbiama chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga

tmojtsiyena jtsamëse, chëngbe
bacna juabnëngaca, nÿa tondaye
chacmondétsogusetana.

Judas, Bëngbe Bëtsá jëtschuayama

²⁴⁻²⁵ Chë nÿe canÿe Bëngbe Bëtsá,
bëngbe Atsebacayá obenana endbomna
tšëngaftanga jtsanÿenama, chca,
tondaye chaondëma tšëngaftanga
Jesucristbeñe ošbuáchiyana
chašmotsajbanama; y obenana
endbomna tšëngaftanga ainaniñe

ndocna bacna soye ndbomnënga
chašmotsemnana y puerte
oyejuayënga cachabe delante
chašmotsemnana, cha canÿe puerte
uamaná y obená bëtsemnana
chaojinÿanÿé ora. Bëngbe Utabná
Jesucristbeyeca, nÿetscanga Bëngbe
Bëtsá chamotsatschuaná; y cha puerte
bëtsá chausomñe, nÿets obenana
bomná y nÿets mando bomná, nÿets
tempscana, tempo, mora y nÿetsca
tescama. Chca chaotsemna.